

| | |
|---|---------|
| Non. Sier Hironimo Donado, fo signor di note, di sier Matio | |
| Sier Bernardin Michiel, è podestà a Seravale, di sier Alvise, ducati 150 e il don | 369.379 |
| Sier Francesco Zustignan di sier Alvise, da San Barnaba | 413.366 |
| Sier Marco di Prioli, fo camerlengo a Vizenza, qu. sier Marin, ducati 200 e il don | 317.415 |
| † Sier Zuan Sagredo, è a la Becharia, di sier Piero, ducati 200 e il don, et è contento si fazi in suo loco a la Becharia | 499.270 |
| † Sier Marco Antonio Barbarigo di sier Gregorio, fo dil Serenissimo, ducati 200 e il don | 482.275 |
| Sier Leonardo Zantani, fo Cao di XL, qu. sier Antonio | 353.404 |

Fo stridato per il primo Gran Consejo Conte a Cherso e Ossero, un Provedador al sal et un Sopragastaldo; cosse insolite a stridarsi, ma per aver danari hora si convien far a questo modo.

Fo mandato in campo ducati 1500.

77 *A dì 29.* La matina se intese quello feno li Avogadori extraordinarii eri in Colegio, *videlicet* preseno retenir Andrea Candi scrivani ai tre Proveditori sora i Officii, qual è con sier Beneto Marin pagador in campo; el qual à tolto *malo modo* ducati . . .

Et cussi fo preso di mandar a tuorlo, *videlicet* scritto al provedador Griti lo mandi di qui con custodia, et questa note li fo scalato la caja e trovato havia sgombrato il tutto.

Et sier Marco Antonio Griti qu. sier Homobon, si apresentò, fu posto in l'Armamento, et Alvixe di le Carte et Nicolò suo fiol trati de li et posti di sopra io li cameroti, Gasparin è in l'Orba. Fo butà il Colegio loro, tocò sier Marco Gabriel, sier Francesco Corner consieri, sier Faustin Bembo avogador, a tento la Signoria à voluto li Avogadori entrino et per leze poleno; et Proveditor sora i officii sier Marco Antonio Bon cao di XL, sier Filippo Querini, et Signori di note sier Giacomo Antonio Orio, sier Agustin Moro qu. sier Marin.

In questa matina, di ordine dil Colegio di lo excellentissimo Consejo di X ordinario, fo chiamà su le scale di Rialto sier Zuan Fero qu. sier Antonio incolpado di l'arte di sodomio con sier Hironimo Michiel qu. sier Alvise qu. sier Maffio, che ambidoy si vengano a presentar a li Cai dil Consejo di X in

termine di zorni 8, *aliter* si procederà contro di loro, la soa absentia non obstante.

Vene in Colegio il Colateral zeneral, vien di campo per stafeta, et disse zerca il bisogno era di danari per pagar li fanti, *aliter* seguirà grandissimi inconvenienti; narando di quelle cosse dil campo, et laudando li zentilhomeni fo dil signor Bortolamio, quali fo quelli dete la vitoria al Christianissimo re contra sguizari.

Di campo, fo letere dil proveditor Griti, da Villafranca, a dì 27

In questa matina, fo chiamà sier Lion Venier qu. 78¹⁾ sier Andrea procurator, justa la parte presa in Quarantia, per il pieder di Provedadori sora i officii: che el dito si vegnia a presentar a le preson, *aliter* si procederà contra di lui la sua absentia non obstante, e questo in termine di zorni 8.

In Quarantia criminal, justa la parte presa in Pregadi, si intrò in la expedition di retenuti per li Avogadori extraordinarii, *videlicet* Gasparo Vicenzo di Guisberti et Lucha Burato conexi nel processo di sier Zuan Emo. Parlò sier Zuan Dollin avogador; li rispose per Vizenzo Guisberti domino Bortolamio da Fin dotor, avochato, et fo rimesso a danatuna a seguir questo caso.

Da poi disnar, fo Consejo di X con la zonta. Et prima feno li soi Cai di X per il mexe di Novembrio, sier Polo di Prioli, sier Piamo da Leze et sier Luca Vendramin *dal Banco*, non più stati.

Item, per bisogno si ha dil danaro, preseno che li Governadori di l'intrade debano al publico incanto vender li molini di Mestre, qual si afita al presente ducati 680 a l'anno. *Item*, li folli, si afita ducati 200 a l'anno. *Item*, el passo che si trageta le barche a Margera, si afita ducati 90 a l'anno, che è zercha ducati 1000 d'intrada; si tien si trarà ducati 10 mila.

Item, fo parlato di vender le possession dil Polesene; *tamen* non fu preso alcuna cosa, perchè non si troverà li danari che le valeno a gran zonta; di le qual si traze ducati . . . a l'anno.

Item, feno altre gratie et expedition, *ut patet*.

Noto. Intesi ozi come el vescovo di Caorle nominato D qual andato a per certe sagre di chiesie, fo preso da quelli di Maran et conduto in Maran con quelli di la soa corte et fato preson.

A dì 30. La matina, in Quarantia criminal, seguendo il caso principiato, parloe domino Petro di

(1) Le carte 77* e 78 sono bianche.